

ՀԱՅԱՍՏԱՆԻ ՀԱՍԱՐԱԿԱԿԱՆ-ՔԱՂԱՔԱԿԱՆ ԳՈՐԾԻՉՆԵՐԸ
ՍՏԱԼԻՆՅԱՆ ԲՈՒՆՈՒԹՅՈՒՆՆԵՐԻ ՏԱՐԻՆԵՐԻՆ

Ա.Ս. ՄԱՆՈՒԿՅԱՆ

1920-ական թվականների երկրորդ կեսը և 1930-ականները նախկին խորհրդային երկրում աչքի են ընկնում սուր քաղաքական բախումներով: 1924թ. Հունվարին, Վ.Լենինի մահից հետո, կոմունիստական կուսակցության մեջ անդիշում պայքար սկսվեց առաջնորդի տեղը զբաղեցնելու համար, որն ավարտվեց կուսակցական ապարատի թեկերն իր ձեռքը հավաքած Ի.Ստալինի հաղթանակով: Ի վերջո, Լ. Տրոցկուն սպանեցին Մեքսիկայում:

1925թ. ԽՍՀՄ-ում ձևավորվեց «Նոր օպոզիցիա», որը գլխավորում էին Զինովիևը և Կամենևը: Այդ օպոզիցիայի ջախջախման ավարտվեց 1927թ. Համկ(բ)Կ XV Համագումարում: Այդ տարիներին բանավեճերը մեկ երկրում սոցիալիզմ կառուցելու հնարավորության, պրոլետարիատի գեկտատուրայի հաստատման, միջակ գյուղացիության հետ բանվոր դասակարգի դաշինքի հաստատման, հեղափոխության սոցիալիստական բնույթի, գաղութային երկրների հեղափոխություններին օժանդակելու, համաշխարհային բանվորական շարժման միասնական ճակատի տակտիկայի հարցերի շուրջ էին:

Կուսակցության ներսում գաղափարական պայքարը զնալով ավելի կտրուկ և անգիշում բնույթ էր ստանում: Երբ 1930թ. արդեն որպես «աջ» կամ «տրոցկիստական աջ թեքում» որակավորված Բուխարինի, Ռիկովի և Տոմսկու դեկավարած շարժման դեմ էին պայքարում, Ի.Ստալինի ելույթը XVI Համագումարում ավելի անհանդուրժողական էր և կոչտ: Հենց այստեղ նա նշեց, թե սրվել է դասակարգային պայքարը, ուժեղացել մահացող դասակարգերի դիմադրությունը խորհրդային իշխանությանը: Աջ թեքման ներկայացուցիչները, ըստ Ի.Ստալինի, միայն ձևական էին ընդունում սոցիալիզմ կառուցելու հնարավորությունը մեկ երկրում և չէին համաձայնում իրենց առաջադրած ճանապարհների հետ: Առավել վտանգավոր էր տրված կարգախոսը. «Առաջիկայում էլ շարունակենք անհաշտ պայքարը կուսակցության միջի այն հաշտվողական տարրերի դեմ, որոնք չեն հասկանում երկու ճակատով վճռական պայքար մղելու անհրաժեշտությունը»¹:

1934թ. Համկ(բ)Կ XVII Համագումարում Ի.Ստալինը հայտարարեց. «Եթե XV Համագումարում հարկ էր լինում դեռևս ապացուցել կուսակցության դժի ճշտությունը և պայքար մղել հակալենինյան որոշ խմբավորումների դեմ, իսկ XVI Համագումարում վերջնականապես ջախջախել այդ խմբավորումների վերջին կողմնակիցներին, ապա այս Համագումարում ապացուցելու բան չկա ու թերևս հարվածելու մարդ էլ չկա (ընդգծումը մերն է – Ա.Մ.)»: Ապա նա նշեց, թե դա չի նշանակում, որ գաղափարական պայքարը ավարտված է, քանզի

¹ Вопросы разведки и контрразведки, 1997, № 19.

² Стен КПСС в резолюциях и решениях, ч. 2, М., 1964, с. 440 – 441, 488 – 491; История КПСС, М., 1982, с. 396.

³ Լենինի դմ, քրեատոմատիա, պրակ II, Ե., 1935, էջ 353 – 360:

⁴ Նույն տեղում, էջ 378:

⁵ Նույն տեղում, էջ 385:

«կուսակցության թշնամիների դադափարախոսության մնացորդները դեռ ապրում են» :

Ստալինի ելույթը տրամադրում էր փնտրելու նոր թշնամիներ: Ճակատագրի դառը բերումով այդ «թշնամիների» շարքում հայտնվեցին նաև նշված համագումարի 1961 պատգամավորներից 1108-ը, և կենտկոմի կազմում ընտրվածներից 98-ը (70 %-ը)⁷: Վերոհիշյալ դադափարական առճակատմանը զուգահեռ անց էին կացվում կուսակցության շարքերի գտման (1933թ.), կուսակցական փաստաթղթերի ստուգման ու փոխանակման (1935 - 1936թթ.) միջոցառումներ:

ՀամԿ(բ)Կ XVII համագումարի օրերին Ի.Ստալինը զգաց, որ իր մեկնիչխանությունը հաստատելու ճանապարհին կարող են առաջանալ լուրջ խոչընդոտներ: Մասնավորապես, արդեն հայտնի է, որ այդ համագումարի որոշ մասնակիցներ Ս.Կիրովին առաջարկել են ստանձնելու առաջին քարտուղարի պաշտոնը, որից նա հրաժարվել է: Փաստ է, նաև այն, որ մոտ 300 պատգամավորներ դեմ էին քվեարկել Ստալինի թեկնածությանը, որի մասին նա չէր կարող չիմանալ:

1934թ. դեկտեմբերին Ս.Կիրովը սպանվում է Լենինգրադում (Ս.Պետերբուրգ): Սպանությունը վերագրվում է աջ-տրոցկիստական կենտրոնին: Սա ազդանշան էր հետագա տարիների և հատկապես 1937 - 1938թթ. զանգվածային բռնությունների համար: Հստ վերջին ուսումնասիրությունների, 1937 - 1938թթ. բռնադատվել է 1,4 մլն մարդ: ՍՄԿԿ XX համագումարում ստեղծված Պ.Պոսպելովի գլխավորած հատուկ հանձնաժողովն իր հաշվետվության մեջ նշեց, որ 1935 - 1940թթ. երկրում հակախորհրդային գործունեության մեղադրանքով ձերբակալվել են 1 մլն 635 հազ. մարդ, որոնցից 688503-ը գնդակահարվել է⁸:

Երկիրն օբյեկտիվորեն ձգվում էր դեպի «ուժեղ» ձեռք, որի ներկայացուցիչներն էին իշխանության երկու գլխավոր հավակնորդները՝ Ի.Ստալինն ու Լ.Տրոցկին: Առկա էր նաև արտասահմանից հրահրվող ընդհատակյա կազմակերպությունների գործունեությունը⁹: Այս ամենն օբյեկտիվորեն նպաստում էին Ի.Ստալինին՝ հաստատելու մենատիրություն, որը խիստ համընկնում էր նրա բնութագրին՝ տրված դեռևս Վ.Լենինի կողմից՝ 1924 թվականին¹⁰:

Զանգվածային կոլեկտիվացման շարժումը (1929 - 1930թթ.) դրսևորեց զանգվածային բռնությունների նկատմամբ երկրի ղեկավարի հակամեթոդներ, որոնք առավել դժգոհ արտահայտվեցին 1937 - 1938թթ. բռնությունների և հետպատերազմյան՝ 1949թ. զանգվածային աքսորի ժամանակ:

Հարկ է անդրադառնալ մի կարևոր հարցի ևս. տվյալ ժամանակաշրջանում իշխող կուսակցությունը կոշտ վերաբերմունք էր ցուցաբերում նաև տարբեր

⁶ Նույն տեղում, էջ 394 - 395:

⁷ М. Горинков и др., История России, М., 1995, с. 247.

⁸ Д. Волкогонов, Триумф и трагедия: И.В.Сталин, политический портрет, кн. 1, ч. 2, М., 1989, с. 95.

⁹ В.П.Дмитриенко и др., История Отечества, XX в, М., 1995, с. 246.

¹⁰ Նույն տեղում, էջ 433:

¹¹ СЕУ Д. Голиков, Крушение антисоветского подполья в СССР, кн. 2, М., 1986, с. 266 - 339.

¹² Տե՛ս ՍՄԿԿ պատմություն, Ե., 1959, էջ 450:

Հանրապետություններում այսպես թե այնպես արտահայտվող ազգային դրսևորումների նկատմամբ՝

ԽՍՀՄ Հանրապետություններից մեկը՝ Հայաստանը, բնականաբար, ապրեց վերը նշված իրադարձությունները՝ կրելով ստալինյան քաղաքականության բոլոր դրսևորումները։ Այդ ամենն առաջին հերթին իրենց վրա կրեցին Հանրապետության Հասարակական-քաղաքական գործիչները, որոնք կամա թե ակամա դառնում էին դրանց կտարողները, մասնակիցները և զոհերը։ Հարկ է հիշել, որ 1918 - 1920թթ. Հայաստանում դաշնակցական կուսակցության առաջնորդությամբ հռչակված Առաջին Հանրապետության փաստը, ապա Հայտնի պատճառներով նրա փոխարինումը Խորհրդային Հայաստանում՝ խոր հետք էին թողել 1920 - 1930-ական թվականների Հայաստանի վրա, և դաշնակցության «վտանգը» Խորհրդային իշխանության Համար առարկայական էր։ Այդպիսով յուրահատկությունն այն է, որ Հայազգի քաղաքական գործիչները ակտիվորեն մասնակցել էին Ռուսաստանի Հեղափոխական, քաղաքական կյանքին և բացի ակտիվ ու Հայտնի բուլճարիկներից ճանաչված գործիչներ ունեին մենչևիկների, էսէռների և այլ կուսակցությունների մեջ, որոնք Հետապալում որակավորվում էին որպես Հակախորհրդային և այլն։ Տրոցկիստական շարժման մեջ աչքի էր ընկնում Վազարշակ Տեր-Վահանյանը, որին ՀամԿ(բ)Կ XV Համագումարում Հեռացրին կուսակցության շարքերից։ Նույն ճակատագրին արժանացավ Սալբուրդի խմբի անդամ Ն. Զավարյանը¹³։ Հետապալում ժողովրդի թշնամի Հայտարարված Ռիկովի Հետ բավական երկար ժամանակ աշխատել է Ս.Տեր-Գաբրիելյանը և այլն։

Հայաստանում քաղաքացիական կռիվներից Հետո առաջին՝ Համեմատաբար դանդաղաձային բռնությունը տեղի ունեցավ 1921 - 1922թթ., երբ 1400 նախկին սպաներ աքսորվեցին Ռյազան՝ 1923թ. անցկացվեց դաշնակցության այսպես կոչված «ինքնավերացման» Համադրմարը, որի առիթով Հայաստանում ինքնաբացահայտվեցին այդ կուսակցության ավելի քան 4000 անդամներ։ 1924թ. տեղի ունեցավ նաև Դաշերիտմիության ինքնավերացման Համագումարը։ Հենց նրանց անդամներն էլ Հետագա տարիներին դարձան բռնությունների առաջին զոհերը։

Բռնարարների մյուս մեծ ալիքը բարձրացավ 1929 - 1933թթ. Համատարած կոլեկտիվացման շրջանում, երբ բռնությունների ենթարկվեց Հիմնականում գյուղական վայրերում ապրող 5615 մարդ։ Բռնությունների այս շրջանում ներքին գործերի ժողովրդական կոմիսարիատում (ՆԳԺԿ) կազմված գործերում որպես Հիմնական մեղադրանք էին հնչում Հակախորհրդային, Հակակոլտնտեսային, բանդիտական, դաշնակցական գործունեությունը, երբեմն՝ տրոցկիզմը։ Վերջինիս դեպքում էլ բռնարարները կապված էին գյուղացիության Հարցերին առնչվող մարդկանց Հետ, ինչպես օրինակ՝ 1933թ. հողկոմժողովմատի դատապարտված աշխատակիցների (Հ.Քամայան, Ս.Միքայելյան և այլն) խմբի ձերբակալումն ու դատապարտումը։ Նշենք նաև, որ տվյալ ժամանակահատվածում զննվող Հարվածների թիվը Հետագա՝ 1937 - 1938թթ. Համեմատությամբ քիչ էր և կազմում էր 104 մարդ։

1936թ. մայիսին Հայտնի Հասարակական-քաղաքական գործիչ, գիտնական Ներսիկ Ստեփանյանի ձերբակալությունից և նույն թվականի հուլիսի 9-ին

¹³ Լենինիզմ, Քրեստոմատիա, պրակ II էջ 379:

¹⁴ Տե՛ս КПСС в резолюциях и решениях, ч. 2, с. 490:

¹⁵ Հայրենիք, նոյեմբեր 1992, մայիս 1994:

Թբիլիսիում տեղի ունեցած Ա.Խանջյանի «Ինքնասպանությունից» հետո սկսվում են զանգվածային բռնությունները Հայաստանի Հասարակական-քաղաքական գործիչների, մտավորականության, զինվորականության, եկեղեցու և այլ ոլորտների Հայտնի ներկայացուցիչների նկատմամբ, որոնք շարունակվում են մինչև 1937թ. սեպտեմբերը:

1937թ. սեպտեմբերին ՀԿ(բ)Կ կենտկոմի պլենումից հետո բռնությունները շարունակվում են այս անգամ այն քաղաքական, պետական գործիչների նկատմամբ, որոնք նախորդ տարիների Հանցագործությունների հեղինակներն էին:

Ընդհանուր առմամբ 1937 - 1938թթ. բռնությունների են ենթարկվում 8104 մարդ, որոնցից 4530-ը գնդակահարվում են: Նշենք, որ բռնությունները զանգվածային բնույթ կրեցին նաև 1949թ., երբ Հայաստանից աքսորվեց շուրջ 2700 ընտանիք կամ մոտավորապես 12000 մարդ:

Այսպիսով 1920 - 1953թթ. Հայաստանում բռնությունների ենթարկված մարդկանց թվաքանակը, ըստ ՀՀ ՆԳ և ԱԱՆ ԱԱ արխիվում կատարած մեր ուսումնասիրությունների, կազմում է ավելի քան 25 հազար մարդ:

1937 - 1938թթ. դատավճիռների, ելյակի որոշումների մեջ ամենահաճախ նշվող մեղադրանքը հակախորհրդային գործունեությունն է: 3729 անգամ, ապա դաշնակցական գործունեությունը՝ 1333, այնուհետև հակահեղափոխական գործունեությունը՝ 508, տրոցկիզմը՝ 109 և, ինչքան էլ տարօրինակ թվա, ընդամենը 9 հոգի մեղադրվում է «մաքուր» ազգայնամոլական գործունեության «հանցանքի» մեջ¹⁶:

Սակայն բազմաթիվ գործերի ուսումնասիրությունը ցույց է տալիս, որ իրականում ՀԽՍՀ ՆԳ-ԺԿ-ում կազմված գրեթե բոլոր մեղադրական եզրակացությունների մեջ վերը նշած մեղադրանքների կողքին անպայման նշվում էր, որ մեղադրվողները զբաղվել են ազգայնամոլական («նացիոնալիստական») գործունեությամբ:

Հայաստանում առաջին հերթին անգիշտում պայքար էր Հայտարարված Դաշնակցության դեմ, որը արտասահմանից, մասնավորապես Իրանից, աշխատանքներ էր կազմակերպում խորհրդային իշխանության դեմ, ինչպես հիշատակում էր Իրանում, ապա Թուրքիայում ՆԳ-ԺԿ ՄԳ-ԲՎ հետախուզության ռեզիդենտ Գ.Աղաբեկովը, որը 1930 թ. փախել էր ԽՍՀՄ-ից¹⁷: Դրա վկայությունն է նաև այն, որ 1929թ. ՀԽՍՀ ՆԳ-ԺԿ մարմինները Հայաստանում բացահայտել էին մի մեծ, ճյուղավորված, ընդհատակյա դաշնակցական կազմակերպություն, որը հակախորհրդային գործունեություն էր ծավալել Հանրապետությունում¹⁸: Այսինքն՝ 1920-ական թվականներին Հայաստանում առկա էր իշխանությունների և դաշնակցականների հակամարտությունը, որը հետագայում 1937 - 1938թթ., օգտագործվեց իշխանությունների կողմից՝ բռնությունների ենթարկելու նաև բոլոր նախկին իրական և ոչ իրական դաշնակցականներին և այդ նույն պատկերի վրա՝ նաև նախկին ռամկավար ու հնչակյան կուսակցությունների ներկայացուցիչներին, որոնք ևս որակավորվեցին որպես ազգայնամոլներ: Սակայն Հայաստանի Հասարակական-

¹⁶ Իրան-Նամե, 1997, № 2 - 3, էջ 3 - 6:

¹⁷ Տե՛ս Շ.Առաքեղյան, Գ.Աղաբեկով, Գ.Աղաբեկով, 1930, թ. 115 - 116, Ռ.Մաքսիմովայն, Դաշնակցության հակառակորդական գործունեությունը Երևանում համաշխարհային պատերազմի տարիներին, Ե., 1986, էջ 16:

¹⁸ ՀՀ Ներքին գործերի և ազգային անվտանգության նախարարության ազգային անվտանգության կարճակետ գործերի ֆոնդ (այսուհետև՝ ՀՀ ՆԳ և ԱԱՆ ԱԱ ԿԳՖ), գ. 13129, թ. 2560:

քաղաքական գործիչների Հիմնական մասը, եթե ոչ բոլորը, նախկինում էին անդամակցել Հայկական ավանդական կուսակցություններին, այլ եղել էին ՌՍԴԲԿ-ի, ապա մենշևիկների, էսէրների և այլ սոցիալիստական կուսակցությունների անդամներ։ Դա ևս օգտագործեցին բռնությունները իրագործողները։

Հայաստանի Հասարակական-քաղաքական իրականության նկատմամբ խորհրդային իշխանությունների գնահատականները շատ հստակ երևում են արդեն 1937թ. սեպտեմբերից հետո ձեռնարկված Հայաստանի պետական, քաղաքական գործիչների ցուցմունքներից։ Այստեղ կարևորում ենք ոչ թե այն, թե ինչքանով էր Համապատասխանում նրանց պատմածը իրականությանը, այլ այն գնահատականները, որոնք տրվում էին այդ տարիներին կոնկրետ իրադարձություններին և անձերին։ Այսպես՝ ՀԽՍՀ ՆԳԺԿ-ի ղեկավար, ՀԿ(բ)Կ ԿԿ-ի և Բյուրոյի անդամ Սոֆյա Մուրադյանը Հարցաքննության արձանագրություններից մեկում կարդում ենք. «Եթե հետևենք Հայաստանում խորհրդային կարգերի գոյության ողջ պատմությանը և վերլուծենք այստեղ կուսակցական և խորհրդային ղեկավար մարմինների գործունեությունը, ապա դժվար չի լինի հաստատել, որ այդ ղեկավար մարմիններն են սխտեմատիկաբար ներթափանցել և ակտիվորեն անցկացրել իրենց գիծը (ես նկատի ունեմ իհարկե խորհրդային ժամանակաշրջանը) թունդ ազդայնամոլները։ Ազդայնամոլությանը Հայաստանի խորհրդայնացման ամենասկզբում Հավատարմորեն ծառայել են Հայկական «սպեցիֆիկները», որոնց պետք է համարել ՀամԿ(բ)Կ-ի՝ խորհրդային իշխանությունների դեմ կազմակերպված պայքարի սկզբնավորողները։ Նրանք իրենց բնույթով նույն դաշնակցականներն էին։ Այդ պայքարը, բարդ ազդային դուզակցումների պայմաններում, ունեցավ մի շարք շրջաններ։

Սկսած 1921թ. մինչև 1927թ. Հայաստանի կուսակցական-խորհրդային ղեկավարությունը գտնվում էր «սպեցիֆիկների» (Սյամնիկով, Լուկաշին, Աշոտ Խոնեսյան, Կարինյան, Համբարձումյան և ուրիշներ) ձեռքում։ Նրանց քաղաքական գիծը գրեթե չէր տարբերվում դաշնակների գծից։

1927թ. «սպեցիֆիկների» ղեկավարության մեջ գլխավոր դերը խաղում էին ԺԳԿ-ի նախագահ Տեր-Գաբրիելյանը և Կենտկոմի քարտուղար Հայկ Հովսեփյանը։ Հատկապես այդ ժամանակ Հայաստանում իրենց գործունեությունը ծավալեցին տրոցկիստները։ Այսպիսով՝ 1930 - 1931թթ. Հայաստանի ղեկավարության մեջ էին ազդայնամոլ նմանյանը, տրոցկիստ Վարդանյանը և աջ Տեր-Գաբրիելյանը։

Այդ ժամանակահատվածը պետք է համարել ՀամԿ(բ)Կ-ի և խորհրդային իշխանությունների դեմ հետագա ակտիվ պայքարի ծավալման համար կադրերի կազմակերպման և տրոցկիստների, ազդայնամոլների ու աջերի միավորման ժամանակամիջոց...

Այս ամենը պատմեցի, որպեսզի Հասկանալի լինի, որ Հայաստանում գոյություն ունեւ միասնական Հակախորհրդային կազմակերպություն, և, որ նրան մասնակցելով, տրոցկիստները և աջերը ճշդ մեծամասնությամբ եղել են ազդայնամոլներ, որոնք կանգնած էին խորհրդային Միությանից Հայաստանի անջատման դիրքերում»¹⁹։

Այդ տարիների իրադարձությունների մասին նույն դատողություններն են արձանագրված նաև 1937թ. սեպտեմբերին ձեռնարկված ՀամԿ(բ)Կ առաջին

¹⁹ Նույն տեղում, գ. 10953, հ. 1, թ. 15 - 18։

քարտուղար Ա.Ամատունու, քարտուղար Ստ.Ակոպովի և մյուսների հարցաքննություններում²⁰:

Ինչպես արդեն նշեցինք, Հայաստանում 1930-ական թվականների ստալինյան զանգվածային բռնությունների առաջին զոհերն էին Ն.Ստեփանյանը և Ա.Խանջյանը: Հարկ է նշել, որ Ա.Խանջյանը, անկախ նրա քաղաքական գործունեության այս կամ այն գնահատանքից, ուժեղ է ազդային կեցվածք, հարգված և սիրված է եղել ժողովրդի կողմից: Նա ամեն կերպ դիմակայել է հատկապես ՀամԿ(Բ) Անդրերկրյանի կողմից կատարվող ճնշումներին: Սակայն 1936թ. մայիսին, երկար դիմադրությունից հետո, նա ստիպված էր համաձայնություն տալ ճանաչված հասարակական-քաղաքական գործիչ, գիտնական Ն.Ստեփանյանի ձերբակալությանը, իսկ մեկ ամիս անց՝ 1936թ. հուլիսի 9-ին ինքը սպանվեց ՀամԿ(Բ) Անդրերկրյանի քարտուղար Լ.Բերիայի աշխատասենյակում²¹: Անգամ արտասահմանի դաշնակցական մամուլը Ա.Խանջյանի մահվան կապակցությամբ հիշատակում էր, թե 1936թ. հունիսի 1 - 4-ը կայացած ՀամԿ(Բ) ԿԿ լիագումար նիստի ժամանակ «ընդունված նոր Սահմանադրության նախագծի և մասնավորապես Անդրկովկասյան Դաշնակցության վերացման հարցի շուրջը խոր տարակարծություններ ունեցավ կուսակցության ղեկավար շրջանների հետ և դրա հետևանքով դրվեց այնպիսի վիճակի մեջ, որ ստիպված եղավ վերջ տալ իր կյանքին»²²:

Իշխանությունները պաշտոնապես հայտարարում են, որ Ա.Խանջյանը ինքնասպանություն է գործել: Հուլիսի 12-ին, նրա թաղման օրը, տեղի է ունենում Հայաստանի կուսակցության ժողով, որտեղ ելույթ ունեցած 23 մասնակիցները առանց իտրականության մեղադրում էին կուսակցության նախկին ղեկավարին՝ դավաճանության, ազգայնամոլության, հակահեղափոխական տրոցկիստական տարրերին (մասնավորապես Ն.Ստեփանյանին) հովանավորելու և այլ «մեղքերի» մեջ²³: Այն, որ կուսակցական բարձրագույն ղեկավարությունը դժգոհ էր Ա.Խանջյանից, հստակ երևում է վերոհիշյալ ժողովում. ՀամԿ(Բ) Անդրերկրյանի քարտուղար Ս.Կուդրյավցևի ելույթից, որտեղ նա նշում է, որ Հայաստանում 1936թ. գարնանից ձերբակալված տրոցկիստների քանակը անհամեմատ քիչ է հարևան Հանրապետություններում. ձերբակալվածների քանակից, քանի որ նրանց բացահայտմանը խանգարում էր Ա.Խանջյանը: Այդ ժողովի 106 մասնակիցներից 71-ը, այդ թվում և ՀամԿ(Բ) Անդրերկրյանի ղեկավարներ Ս.Կուդրյավցևը, Մուսաբեկովը, Ագնիաշվիլին, ՀԿ(Բ) և պետական ղեկավարներ Ա.Ամատունին, Ստ. Ակոպովը, Գ.Ծատուրովը, Խ.Մուրդուխին և մյուսները հետագա տարիներին ևս ենթարկվեցին բռնությունների:

1936թ. հուլիսից սանձազերծված բռնությունների զոհ դարձան ՀԿ(Բ) ԿԿ նախկին քարտուղարներ Գ.Ալիխանյանը, Ս.Սրապիոնյանը (Լուկաշին), Ա.Հովհաննիսյանը, Հ.Հովսեփյանը, Հ.Կոստանյանը, Ա.Խանջյանը, Ա.Մարգարովը, Ա.Գալոյանը, Ս.Վարդանյանը, Հայաստանի ռազմահեղափոխական կոմիտեի առաջին նախագահ Ս.Կասյանը, ՀԽՍՀ Ժողովրդաբուհի նախկին նախագահ Ս.Տեր-Գաբրիելյանը, ՀԽՍՀ Կենտրոնականի նախկին նախագահներ Ս.Մարտիրոսյանը, Գ.Հանեսոդյանը, լուսժողովներ Ն.Ստեփանյանը, Ա.Եղիազարյանը, ճանաչված կուսակցական և պետական գործիչներ

²⁰ Նույն տեղում, դ. 8997, 4234:

²¹ Տե՛ս նժար, 2. X. 1996, Республика Армения, 9. VII. 1996:

²² Վեմ, ԺԵ, մայիս - հունիս, Փարիզ, 1936, էջ 105:

²³ ՀՀ ՆԳ և ԱԱՆ ԱԱ արխիվ, սկսում. ֆ., գ. 186:

Դ.Շահվերդյանը, Ալ. Բեկզադյանը, Ա.Մելիքյանը, Ռ.Դաշտոյանը, Ար.Երզնկյանը և շատ ուրիշներ:

1930-ական թվականներին Հայաստանում ստալինյան բռնությունների իրական պատկերը հետազոտելու առումով խիստ կարևորվում է Մարքսիզմ-լենինիզմի ինստիտուտի տնօրեն, Երևանի պետհամալսարանի և մանկավարժական ինստիտուտի դասախոս, նախկին լուսժողովում Ներսիկ Ստեփանյանի բազմահատոր քննչական գործի ուսումնասիրությունը²⁴: Նրա հետ «Հանցագործ կապերի» մեջ լինելու մեղադրանքները հանդիպում են 1936 - 1938թթ. դատապարտված գրեթե բոլոր հասարակական-քաղաքական գործիչների, գիտության, դրականության և արվեստի ներկայացուցիչների գործերում, որոնք, որպես կանոն, սկսվում են հետևյալ կերպ. «ՆԳԺԿ մարմինների կողմից Հայաստանում բացահայտվել և վերացվել է հակահեղափոխական, աջ-տրոցկիստական, ազգայնամոլական կազմակերպություն, որը նպատակադրել էր խորհրդային իշխանության գինված տապալումը, Հայաստանի անջատումը խորհրդային Միությունից և, այսպես անվանված, «անկախ» ազգային-բուրժուական հայկական պետության ստեղծումը՝ կապիտալիստական պետություններից մեկի հովանավորության տակ»²⁵: Ըստ ՆԳԺԿ «տվյալների» վերոնշյալ կազմակերպության առաջնորդն էր Ն.Ստեփանյանը՝ Ա.Խանյանի հովանավորությամբ կամ գլխավորությամբ:

Ավելորդ չենք համարում ներկայացնել Ն.Ստեփանյանի մեղադրական եզրակացությունում տրված հիմնական մեղադրանքները, որոնք, որոշ աննշան խմբագրական փոփոխություններով հանդիպում են գրեթե բոլոր բռնադատվածների գործերում: Այսպես՝ «1. Եղել է հակահեղափոխական, տրոցկիստական, ահաբեկչական կազմակերպության մասնակից, որը 1934թ. դեկտեմբերի 1-ին չարագործորեն իրագործել է ընկ. Ս.Մկիթյանի սպանությունը և ահաբեկչական ակտեր նախապատրաստել ՀամԿ(ք)Կ և խորհրդային իշխանության ղեկավարների դեմ:

2. Մտել է Հայաստանի տրոցկիստական-ազգայնամոլական, ահաբեկչական կազմակերպության Կենտրոնի կազմի մեջ, որն իր առջև խնդիր էր դրել ահաբեկչություն իրագործել ընկ. Ստալինի նկատմամբ և ահաբեկչություն էր նախապատրաստում ընկ. Լ.Բերիայի նկատմամբ:

3. 1932թ. Հայաստանում կազմակերպել է տրոցկիստական-ազգայնամոլական, ահաբեկչական կազմակերպություն, որի մեջ ընդգրկել է մի շարք մարդկանց, որոնք պատասխանատվության են կանչված այս և ուրիշ գործերով»²⁶:

Հետագա տարիներին պարզվեց 1930-ական թվականների մեղադրանքների անհիմն լինելը, և փաստորեն բռնադատվածների մեծ մասը արդարացիվեց: Ծիշո է, չկար կազմակերպված գործունեություն, սակայն հասարակական-քաղաքական գործիչների և մտավորականության որոշ ներկայացուցիչներ իրոք ունեին դժգոհություններ տիրող իրավիճակից, մասնավորապես, Հայաստանի երկակի կախվածությունից՝ Թբիլիսիից (Հանձինս ՀամԿ(ք)Կ Անդրերկրյանի) և Մոսկվայից, հավանություն չէին տալիս Ստալինի ստեղծած մենատիրության մթնոլորտին և այլն: Այդ առումով Ն.Ստեփանյանն անշուշտ աչքի է ընկել իր

²⁴ Տե՛ս նույն տեղում, ԿԳՖ, գ. 3036:

²⁵ Նույն տեղում:

²⁶ Նույն տեղում, գ. 3036, № 1, Բ. 364:

Համարձակ մտքերով, և պատահական չէր, որ բանավեճերի առաջին զոհերից մեկը նա դարձավ²⁷:

1937թ. հուլիսի 7-ին ԽՍՀՄ Գերագույն դատարանի զինվորական կոլեգիան Ն. Ստեփանյանին դատապարտում է զննակազարության իսկ. նույն դատական մարմինը 1956թ. օգոստոսին նրան արդարացնում է՝ գործը կարճելով Հանցակազմի բացակայության պատճառով:

1930-ականներին Հայաստանում կատարվող ստալինյան չարագործությունների մեջ քիչ չեն դեպքերը, երբ անպաշտպան վիճակում գտնվող անմեղ մարդկանց խոչտանգելով սպանում էին: Այդպիսի ողբերգական վախճան ունեցան նաև 1928 - 1935թթ. ՀԽՍՀ Ժողկոմխորհի նախագահ, 1902թ. ՌՍԴԲԿ-ի անդամ, Հայաստանի բուլժեկիյան կուսակցության Հիմնադիրներից Սահակ Տեր-Գաբրիելյանը, 1899թ. ՌՍԴԲԿ-ի անդամ, նախկինում Հայտնի մենշևիկյան գործիչ, 1921-ից ՀամԿ(բ)Կ անդամ, ՀԳԿ-ի առաջին նախագահ Արամայիս Երզնկյանը, ՀԿ(բ)Կ ԿԿ կուսկոլեգիայի քարտուղար Աղասի Գալոյանը և ուրիշներ:

Ս.Տեր-Գաբրիելյանը ձերբակալվեց Սոսկվայում, որպեսզի աշխատում էր ԽՍՀՄ թեթև արդյունաբերության ժողկոմատում և ուղարկվեց, Նրևան՝ մեղադրվելով «Հայկական ազգայնամոլական կազմակերպության Կենտրոնի» ղեկավար լինելու մեջ, որը դաշինքի մեջ էր մտել «աջ-տրոցկիստական» կազմակերպության հետ²⁸: Ձխորանալով գործում եղած անհիմն մեղադրանքների մեջ, նշենք, որ 1937թ. օգոստոսի 21-ին Ս.Տեր-Գաբրիելյանը, նետվելով կամ ՆԳԺԿ-ի աշխատակիցներ Ի.Գևորգյուհի և Ե.Նիկողոսովի կողմից դուրս գցվելով 3-րդ Հարկի պատուհանից, մահանում է: Կան ՀԽՍՀ ՆԳԺԿ ղեկավար աշխատակիցներ Մուղղուսու, Գևորգյուհի և Նիկողոսովի ցուցմունքներն այն մասին, որ Ս.Տեր-Գաբրիելյանին իբր թե իրենց Հանցագործությունները չբացահայտելու նպատակով սպանել են, սակայն կան նաև տվյալներ, թե նրանք այդ «խոստովանությունները» կատարել են կոտանքների ազդեցության տակ, և իրականում Ս.Տեր-Գաբրիելյանը ինքնասպանություն է գործել Հարցաքննության ժամանակ՝ դուրս նետվելով պատուհանից: Ասենք, որ վերջին տվյալները Նիկողոսովի և Գևորգյուհի բանտախցի ընկերների պատմածներն են: Մի՞թե նրանք բանտախցում կասեին, թե իրենք են սպանել Ս.Տեր-Գաբրիելյանին: Մյուս կողմից, նրանց խոստովանությունները Հարցաքննության ժամանակ կարող էին լինել խոչտանգումների հետևանք: Կարծում ենք, որ ամեն դեպքում տեղի էր ունեցել նողկալի սպանություն:

Ա.Երզնկյանը ձերբակալվեց 1936թ. նոյեմբերին և մեղադրվեց որպես «Հակահեղափոխական, ազգայնամոլական խմբի ակտիվ անդամ»: Կրկին չներկայացնելով անհիմն մեղադրանքների մանրամասները՝ մեջ բերենք 1936 - 1937թթ. ՀԽՍՀ ՆԳԺԿ բարձր պաշտոնյաներից մեկի ցուցմունքը, որը հետագայում պատասխանատվության է ենթարկվել որպես անօրինակա-նությունների մասնակից և ղեկավար ու զննակազարկել. «Ինձ Ասլանովը (ՆԳԺԿ պարետը - Ա.Մ.) ասաց, որ նա Մուղղուսուց Հանձնարարություն ունի բանտում այնպիսի պայմաններ ստեղծել ձերբակալված Երզնկյանի Համար, որ նա մեռնի... Երզնկյանին տեղավորել էին ամենավատ կարգերում, այն դեպքում, երբ նա այն ժամանակ առանց այն էլ Հիվանդ էր: Երզնկյանն այդ պայմանները

²⁷ Նույն տեղում, պատմ. ֆ., գ. 186, էջ 5:

²⁸ Նույն տեղում, ԿԳԾ, գ. 5407, հ. 2, թ. 289:

չկարողացա՞յ տանել և կարցերում տեղավորվելուց մի քանի օր անց մահացա՞յ»²⁹ :

Խոշտանդումների հետևանքով բանտում 1938թ. մայիսի 6-ին մահացավ նաև Ա.Գալոյանը³⁰ :

Նույն՝ 1938թ. նոյեմբերին ձերբակալվում է նաև այդ տարիների ՀՕԿ-ի նախագահ, ՀԽՍՀ Ժողկոմխորհի նախագահի նախկին տեղակալ Արսեն Եսայանը՝ նույնպիսի մեղադրանքներով և մահվան դատապարտվում 1938թ. հուլիսի 18-ին³¹ :

Եթե զուգահեռ տանենք ԽՍՀՄ-ում (կենտրոնում) և Հայաստանում կատարվող բռնությունների մեջ, ապա ակնհայտ են նույն մոտեցումները: Այսպես՝ Ի.Ստալինը «Հատուկ» վերաբերմունք էր դրսևորում բոլշևիկյան Հին դավադրայի նկատմամբ ու ասպարեզից հանում էր Լենինի գինակիցներին: Դրանք հնարավոր կամ իրական հակառակորդներ էին իշխանության համար մղվող պայքարում և չափից ավելի լավ գիտեին Ստալինի անցած հեղափոխական ուղու մասին: Նույն տրամաբանությամբ տեղերում ևս վերացնում էին հնագույն բոլշևիկներին, որոնք, բացի վերոհիշյալ սխառճառներից, «խանգարում» էին տեղական մասշտաբի կուսակցականներին: Ս.Տեր-Գաբրիելյանից, Ա.Խանջյանից, Ա.Երզնկյանից բացի այդ բռնությունների զոհ դարձան Հայաստանի հեղկոմի առաջին նախագահ Ս.Կասյանը, ՌՍԴԲԿ-ի հնագույն անդամներ Դ.Շահվերդյանը, Ստ.Շահումյանի գլխակից և ազգական (քրոջ ամուսինը) Ռ.Դաշտոյանը, Ար.Բեկդադյանը, Ա.Մելիքյանը և ուրիշներ: Նրանք իրենց հեղինակությամբ հավանաբար խանգարում էին ոչ միայն ՀԿ(բ)Կ-ի ԿԿ-ի նոր ղեկավարներին, այլև ՀամԿ(բ)Կ Անդերկրկոմի ղեկավարներին, որոնց 1936 - 1937թթ. գլխավորում էր տխրահռչակ Լ.Բերիան:

Քանի որ վերոհիշյալ գործիչների մեղադրանքները գրեթե չէին տարբերվում իրարից, ուստի ներկայացնենք դրանցից մի քանիսը: Այսպես՝ 1937թ. հուլիսին ձերբակալված Ռուբեն Դաշտոյանին 1938թ. հուլիսի 18-ին դատապարտում են ղեկավարության այն մեղադրանքով, որ նա հեղել է Հայաստանում գործող հակախորհրդային աջ-տրոցկիստական ազգայնամոլական ահաբեկչական կազմակերպության անդամ և օգտագործելով ԿԳԿ-ի նախագահի տեղակալի իր պաշտոնը՝ խանգարում էր կուսակցության և կառավարության դյուղատնտեսական խնդիրները կատարելուն և այլն³²: Գրեթե նույնությամբ այն կրկնվում է 1937թ. փետրվարին ձերբակալված և 10 տարի ազատազրկման դատապարտված Դանիել (Դանուշ) Շահվերդյանի մեղադրականում, որտեղ նշվում է, թե նա «ՀամԿ(բ)Կ շարքերում լինելով երկերեսանի հակահեղափոխական, տրոցկիստ-ազգայնամոլ, 1931թ. հարել է Ստեփան Վարդանյանի (այդ տարիների ՀԿ(բ)Կ ԿԿ 2-րդ քարտուղար - Ա.Մ.) հ-հ (հակահեղափոխական - Ա.Մ.) տրոցկիստական խմբին» և այլն³³:

Այդ տարիների համար խիստ բնորոշ էր 1936թ. հուլիսի 12-ին կայացած Հայաստանի կուսակցության Ժողովի մասնակիցների մեծ մասի ճակատագիրը, ուստի ավելի մանրամասն անդրադառնանք այդ իրադարձությանը: Ա.Խանջյանի իրավ համաթողովրդական թաղման արարողությունից հետո Երևանում ՀամԿ(բ)Կ Անդերկրկոմի ներկայացուցիչներ Կուրբյավցևի,

²⁹ Նույն տեղում, գ. 908, թ. 144, մանրամասն տե՛ս Ազգ, 5. III, 1996:

³⁰ ՀՀ ՆԳ և ԱԱ ՍԱ արխիվ, ԿԳՖ, գ. 1214, Ազգ, 9. III, 1996:

³¹ Նույն տեղում, գ. 731:

³² Նույն տեղում, գ. 6935, թ. 100 - 104:

³³ Նույն տեղում, գ. 17, թ. 236:

Մոսաբեկովի, Ազնիաշվիլու մասնակցությամբ տեղի ունեցավ վերահիշյալ ժողովը, որտեղ քննարկվում էր ՀԿ(ք)Կ ԿԿ նախկին առաջին քարտուղար Ա.Խանջյանի ինքնասպանության հարցը: Ժողովի գրեթե բոլոր մասնակիցները, այդ թվում և Թբիլիսիից եկած Հյուբերը մասնակցել էին Հայաստանի նախկին ղեկավարի թաղման արարողությանը: Ժողովի ժամանակ ելույթ ունեցան 23 հոգիներ, որոնք առանց բացառության դատապարտեցին Ա.Խանջյանի «դավաճանական արարքը», միաժամանակ մեղադրանքներ հնչեցնելով նրա մտերիմների և արդեն ձերբակալված Ն.Ստեփանյանի հասցեին: Դժվար է միանշանակ ասել, թե նրանցից ովքեր էին անկեղծ, ովքեր էին աթոռի ակնկալիքով շարժվում կամ ովքեր էին փորձում փրկել իրենց և ընտանիքի անդամներին հնարավոր բռնարարքներից: Սակայն, ինչպես ցույց է տալիս վերլուծությունը, ՀԿ(ք)Կ ԿԿ քարտուղարներ Ա.Ամատունին, Ստ.Ակոպովը, շրջկոմի քարտուղարներ Գ.Ծատուրովը, Մ.Դանիելյանը, ՆԳժԿ ղեկավար Խ.Մուղդուսին և մի շարք այլ գործիչներ մտել էին վերևից իջեցված իրենց դերի մեջ: Անհանդուրժողականության մեթոդորտում ընթացող ժողովի այդ և ուրիշ ներկայացուցիչներ արդեն իսկ այնպիսի մեղադրանքներ էին նետում իրենց կուսակցական ընկերների հասցեին, որոնք մի քանի ամիս անց, գրեթե նույնությամբ, կրկնվում էին ՆԳժԿ-ում կազմված մեղադրական եզրակացությունների մեջ: Բերենք մի քանի օրինակ: Ժողովականների կողմից, բառիս բուն իմաստով, հարձակում սկսվեց ելույթ ունեցող Թալինի շրջկոմի առաջին քարտուղար Ընձակ Տեր-Վահանյանի դեմ: Պատճառը ակնհայտ էր: Նրա եղբայրը Հայտնի տրոցկիստ Վաղարշակ Տեր-Վահանյանն էր, որը 1927թ. ստորագրել էր «46»-ի Հայտարարությունը և համարվում էր համամիութենական աջ-տրոցկիստական կենտրոնի անդամ: Նա, իհարկե, բռնադատվել էր միութենական համապատասխան մարմինների կողմից: Ահա, այդ ամենը գիտենալով՝ հասկանալի է դառնում, թե ինչո՞ւ էին որոշ ժողովականներ, մասնավորապես ԱՀ-ի նախկին աշխատակից Գ.Ծատուրովը և անձամբ Ս.Կուզրյավցևը, փաստացի խաչաձև հարցաքննություն սկսել Ը.Տեր-Վահանյանի նկատմամբ: Նրանց հետաքրքրում էր, թե որտե՞ղ և ե՞րբ է հանդիպել իր եղբորը, ինչի՞ մասին են խոսել և, քնականաբար, մեղադրում էին տրոցկիստական հայացքների մեջ: Դժվար չէ կուսակցի, թե այդ ամենից հետո ինչ էր սպասվում նվիրված բուլլետեն Ը.Տեր-Վահանյանին: Մեկ ամիս անց՝ 1936թ. օգոստոսի 22-ին, նրան վտարում են ՀամԿ(ք)Կ շարքերից և ձերբակալում, իսկ 1937թ. հուլիսի 8-ին դատարանի վճռով, որտեղ նշված էր, թե եղել է հակահեղափոխական կազմակերպության անդամ և «Հակահեղափոխական» կազմակերպական կապ էր պաշտպանում եղբոր՝ Տեր-Վահանյանի հետ, գնդակահարում³⁴:

Ժողովին հաջորդած ամիսներին Հայաստանում սկսվում են Հասարակական-քաղաքական գործիչների, մտավորականների և այլ խավերի ճանաչված ներկայացուցիչների զանգվածային ձերբակալությունները, որոնց մեջ առաջին հերթին Ա.Խանջյանի մտերիմներն էին: Ինչպես արդեն հիշատակել ենք, բռնությունների ենթարկվեցին նաև այդ ժողովի մասնակիցների 70 %-ը՝ ՀԿ(ք)Կ ԿԿ բյուրոյի անդամներ Գ.Հանեսօղլյանը, Ա.Անանյանը, Մ.Ենգիբարյանը, Ս.Մարտիկյանը, Թադի-Ջադեն, Շահսուվարովը: Սակայն բռնություններից զերծ չմնացին նաև նույն բյուրոյի անդամներ Ա.Ամատունին, Ստ. Ակոպովը, Խ.Մուղդուսին: Այսինքն, բռնադատվեց ողջ բյուրոյի կազմը:

³⁴ Նույն տեղում, գ. 2512, հ. 1, թ. 6, 203:

Նույն դառը բախտին արժանացան ՀԿ(Բ)Կ ԿԿ բյուրոյի թեկնածուներ Լ.Արիսյանը, Ա.Եղիազարյանը և Ա.Շահապատյանը:

Մինչև 1937թ. սեպտեմբերը ձերբակալված Հասարակական-քաղաքական գործիչներին մեղադրում էին իբրև Ա.Խանջյանի, Ն.Ստեփանյանի, Մ.Տեղ-Գաբրիելյանի կողմից ղեկավարվող Հակահեղափոխական, աջ-տրոցկիսական, ազգայնամոլական, ահաբեկչական կազմակերպության անդամներ, իսկ սեպտեմբերյան պլենումի ժամանակ ձերբակալված Ա.Ամատունու, Ստ.Ակոպովի, Խ.Մուղղուտուն, Գ.Մատուրովի և մյուսներին, տալով նույն մեղադրանքները, ավելացնում էին, թե այդ կազմակերպությունը իբրև թե շարունակել է գլխավորել ՀԿ(Բ)Կ ԿԿ առաջին քարտուղար Ա.Ամատունին:

Դեռևս Հնարավոր չէ Հաստատ Հայտարարել, թե ինչքան է Հայաստանում 1930-ականներին բռնադատվածներից Հասարակական-քաղաքական գործիչների ստույգ թվաքանակը, սակայն ստացված նախնական թիվն արդեն իսկ խոսում է այն մասին, որ դա բավականին լուրջ կորուստ էր Հայ Հասարակական-քաղաքական ներուժի համար: Այսպես՝ ըստ ՀՀ ՆԳ և ԱԱՆ ԱԱ արխիվի ԿԳՖ-ի ցուցակային տվյալների, 1936 - 1938թթ. նրանց թիվը կազմում է 69 մարդ, որոնցից 33-ը զննակազարկել են, իսկ մյուսները ստացել տարբեր ժամկետների ազատազրկում: Սակայն վերոհիշյալ ժողովի մասնակիցների Հետագա ճակատագիրը ճշտելու նպատակով մեր ուսումնասիրությունը ցույց տվեց, որ տվյալ ցուցակում չկան ժողովին մասնակցած և Հետագայում բռնադատված 15 հոգու անուններ, ուստի անվարան ընդհանուր թվաքանակին կարելի է ավելացնել այդ անունները, և այն կդառնա 84 Հասարակական-քաղաքական գործիչ: Այնուամենայնիվ, հարկ է հաշվի առնել, որ ցուցակներում նախկին Հայտնի Հասարակական-քաղաքական գործիչներից ոմանք կարող են ներկայացված լինել որպես թույլակառուներ կամ ձերբակալվելիս աշխատել են, ասենք, որպես Հրատարակչության տնօրեններ կամ թերթերի, ամսագրերի խմբագիրներ և այլն: Այնպես որ 100-ի հասնող ճանաչված Հասարակական-քաղաքական գործիչների քանակը զգալի հարված էր Հայաստանի ակտիվ մտավոր ներուժին: Համեմատության համար բերենք, մեր ճշտած, 1930-ական թվականներին բռնադատված գիտության, արվեստի և գրականության գործիչների թվաքանակը՝ 98 մարդ: Նրանց մեջ էին Հասարակական-քաղաքական գործիչներ Ն.Ստեփանյանը, Ե.Զուբարը, Ա.Հախումյանը, Թ.Ավդալբեգյանը, Պ.Մակինցյանը և ուրիշներ:

Կրկին ներկայացնենք 1936թ. հուլիսի 12-ի ժողովի մասնակիցներից մի քանիսի մեղադրանքները, որպեսզի առավել ամբողջանա չարագործության ընդլիժն ու չափը: Այսպես՝ նախկին լուսժողով Ա.Եղիազարյանը ձերբակալվում է 1936թ. նոյեմբերին և մեղադրվում որպես Հակախորհրդային աջ-տրոցկիսական կազմակերպության ղեկավարներից մեկը: Նշենք, որ 1935թ. Խանջյանի դեմ Ա.Երզնկյանի, Ա.Եսայանի և Ա.Եղիազարյանի կողմից մի նամակ էր պատրաստվել և ուղարկվել ՀամԿ(Բ)Կ, որը Հայկոմկուսի վերնախմբի միջև ընթացող ներպաշտոնական պայքարի արտահայտությունն էր: Այդ նամակը ՀամԿ(Բ)Կ Կենտկոմը անհիմն էր գնահատել, սակայն, ինչպես նկատելի է, այդ նամակը պատրաստողները բոլորն էլ բռնադատվեցին իշխանությունների կողմից: Հետաքրքիր է, որ Ա.Խանջյանի դեմ պայքարողները նրա մահն ընդունել էին ցավով: Ա.Եղիազարյանը, մասնավորապես իր գրույցներից մեկում ասել էր, թե ինքը գտնում էր, որ դա կօգտագործվի Ա.Ամատունու, Ս.Ակոպովի և Խ.Մուղղուտուն կողմից՝ պայքար ծավալելու «Հայկական ազգայնամոլության» դեմ, և Անդրերկրկոմի քաղաքական գիծն արդարացնելու համար կսկսվի

«երիտասարդների ծեծը»³⁵: Ա.Նղիազարյանը մահացել էր բանտում՝ չդիմա-
նալով կոտանքներին, իսկ Ա.Նսալյանին զնդակահարել էին: Նրանց բոլորին
մեղադրել էին Ա.Խանջյանի հետ «Հանցագործ» կապի մեջ լինելու համար: Նույն
մեղադրանքով ձերբակալվեցին ՀԽՍՀ Կենտգործկոմի նախկին նախագահներ
Գ.Հանեսողյանը և Ս.Մարտիրոսյանը, որոնցից առաջինը զնդակահարվեց ՀԽՍՀ
Խոյակի որոշմամբ, իսկ երկրորդը ստացավ 8 տարի ազատազրկում: Ուշագրավ է
1902թ. կուսակցական ակտիվ գործիչ Ս.Մարտիրոսյանի 1956թ. գրուվթյունը՝
Ս.Տեր-Գաբրիելյանի գործը վերանայելու կապակցությամբ: Այնտեղ,
մասնավորապես, նշվում է, որ «1935թ. Ս.Տեր-Գաբրիելյանը չկարողացավ
տանել այն մթնոլորտը, որը ստեղծել էին Թբիլիսիից եկած Ակոպովը,
Ծատուրովը, Մուղդուխին և մյուսները, իրեն պաշտոնից ազատելու մասին
գիմով տվեց ՀամԿ(բ) ԿԿ, որը հարգվեց: Այնուհետև սկսվեցին ինտրիգներն ու
հալածանքները հենց Խանջյանի դեմ, որը 1936թ. հուլիսին ինքնասպանությամբ
կատարեց: Դրանից հետո՝ 1936թ. վերջերին և 1937թ. սկզբներին, սկսվում են
ազնիվ կուսակցականների և խորհրդային կադրերի զանգվածային
ձերբակալությունները... Բոլոր նրանց մեղադրում էին աջ-տրոցկիստական,
ազգայնամոլական-ազաբեկչական կազմակերպության մասնակցելու մեջ, որը
գլխավորում էին Խանջյանը և Տեր-Գաբրիելյանը...»³⁶:

Նույն մեղադրանքներով զնդակահարվեցին Հ.Ղարիբյանը (չրջկոմի
քարտուղար), Հ.Դեմիրճյանը (չրջկոմի քարտուղար), Մ.Դանիելյանը (ժողկոմ-
խորհրդի նախագահ), Ռ.Դաշտոյանը (ժողկոմխորհի քարտուղար), Ն.Կուրսեյը
(ճանաչված քաղաքական գործիչ, գործարանի տնօրեն), Վ.Մամիկոնյանը
(պետքանկի տնօրեն), Պ.Պետրոսյանը (չրջկոմի քարտուղար), Լ.Արիսյանը
(լուսժողկոմ), Ա.Դաստալյանը (առևտրի ժողկոմ) և շատ ուրիշներ:

Մի փոքր այլ մոտեցում է պահանջում 1937թ. ՀամԿ(բ) ԿԿ-ի
սեպտեմբերյան պլենումի ժամանակ և նրանից հետո ձերբակալված
քաղաքական գործիչների գործերի ուսումնասիրությունը: Ինչպես հայտնի է,
այդ պլենումին մասնակցելու համար Հայաստան էին ուղարկվել ՀամԿ(բ) ԿԿ-ի
ներկայացուցիչներ Մալենկովը, Միկոյանը և Բերիան: Հենց պլենումի ժամանակ
ձերբակալվեցին ՀԿ(բ) քարտուղարներ Ամատունին, Ստ.Ակոպովը և ՆԳԺԿ
ժողկոմ Մուղդուխին: Այնուհետև, ձերբակալվում են նաև նույն քաղաքական
գործիչների հետ մինչ այդ Հայաստանում ՀամԿ(բ) ԿԿ գիծը անշեղորեն
կիրառած այլ քաղաքական գործիչներ, ՀԽՍՀ ՆԳԺԿ բազմաթիվ ղեկավար և
շարքային աշխատողներ, որոնցից առաջինները կրկին մեղադրվում էին աջ-
տրոցկիստական, ազգայնամոլական կազմակերպության անդամներ լինելու մեջ,
իսկ երկրորդները՝ նաև անօրինականություններ կատարելու համար: Այստեղ,
իհարկե, գործում էր բռնապետին հատուկ երկաթյա տրամաբանությունը, որի
համաձայն պարբերաբար ասպարեզից վերացվում էին ոճրագործությունների
կատարածուները և վկաները:

Տարօրինակ է, բայց փաստ, որ անկախ այն բանից, թե տվյալ գործիչները
ունեին ինչ-ինչ մեղքեր կամ իրապես հանցագործություններ էին կատարել,
նրանց նկատմամբ ևս կիրառվում էին անօրինական բռնություններ, շատ
դեպքերում. տրվում էին անհիմն մեղադրանքներ (ասենք, Ա.Խանջյանի
ղեկավարած հակահեղափոխական, ազգայնամոլական կազմակերպության
անգամ լինելը և այլն): Դրա վկայությունն է, օրինակ, այն փաստը, որ

³⁵ Նույն տեղում, գ. 5407, հ. 2, թ. 40:

³⁶ Նույն տեղում, թ. 220:

Ա.Ամատունու գործը վերանայելիս՝ 1977թ. այն կարճվել է³⁷: Իհարկե, ոչ ոք չի կարող ժխտել, որ հենց նրա ղեկավարության օրոք է կատարվել Հանրապետության մտավոր, քաղաքական սերունդի անխնա ջարդը, նամակ ուղարկվել ՀամԿ(Բ)Կ Կենտկոմ, որտեղ խնդրում էին ավելացնել Հայաստանում բռնությունների ենթակա քաղաքացիների թվաքանակը՝ և այլն: Սակայն անգամ նրա մահվան դատավճիռը կատարվել է՝ չպաշտպանելով օրենքի սահմանները³⁸:

Նման մոտեցում է պահանջում նաև ՀԿ(Բ)Կ Կենտկոմի երկրորդ քարտուղար Ստ.Ակոպովի, ժողկոմ Գ.Ծատուրովի և մյուսների գործերի քննությունը, որոնցից առաջինին գնդակահարեցին, իսկ երկրորդը ստացավ 8 տարի ազատազրկում³⁹:

Բնականաբար, անխնա վերացվեցին նաև Հայաստանի բռնությունները իրագործող հիմնական դերակատարները՝ ՀԿ(Բ)Կ Կենտկոմի բյուրոյի անդամ, ՀԽՍՀ ժողկոմ Մուղդուսին, նրա տեղակալ Գևորգյուր, ՆԳԺԿ բարձրաստիճան աշխատակիցներ Նիկողոսովը, Կոստիկյանը և ուրիշներ:

1937թ. սեպտեմբերին ՀամԿ(Բ)Կ ԿԿ պատվիրակության հետ Լիտվինի ղեկավարությամբ գործող ԽՍՀՄ ՆԳԺԿ քննիչները՝ Ալլումանը, Գեյմանը, Յախոնտովը, իրենց նախկին գործընկերների նկատմամբ ցույց տվեցին նույնախիսի դաժանություն և ցինիզմ՝ «խոստովանություններ» կորզելու նստատեղով: Ինչպիսին ցույց էին տվել նրանք իրենց անմեղ զոհերի նկատմամբ: Օրինակ, այդ պայմաններում գտնվող Մուղդուսին ձերբակալման հենց առաջին օրվանից տալիս էր «անկեղծ խոստովանանքներ», սակայն միևնույն էր՝ նրան խոչտանդում էին և վերջիվերջո դատապարտեցին գնդակահարության⁴⁰: Զիտորանսովը նրանց, այսպես կոչված, հետաքննությունների մանրամասների մեջ, Հիշատակինք ընդամենը մեկ փաստ Մուղդուսու գործունեության մասին: Ինչպես նշված է ԽՍՀՄ զինվորական դատախազության 1958թ. եղրակացության մեջ, «պարզվել է, որ 1937թ. օգոստոսի 1-ից մինչև սեպտեմբերի 18-ն ընկած ժամանակահատվածում Հայաստանի ԽՍՀ ՆԳԺԿ եռյակը Մուղդուսու ղեկավարությամբ քննել է 354 մարդու հետաքննչական գործեր, որոնցից ՊԱԶ-ի (սլատի առավելագույն չափի - Ա.Մ.) դատապարտվել են 304 մարդ և տարբեր սլատաչափեր են ստացել 50 մարդ»⁴²: Սա, իհարկե, նրա կատարած բռնարարների ամբողջ պատկերը չէ: Բռնությունների տրամաբանությամբ քննիչներ Լիտվինը, Ալլումանը, Յախոնտովը, Գեյմանը և մյուսները ևս հետագայում բռնադատվեցին⁴³:

1937թ. սեպտեմբերից հետո ձերբակալված քաղաքական գործիչների, մասնավորապես ՀամԿ(Բ)Կ Կենտկոմի քարտուղար Ամատունու, Ստ.Ակոպովի ղեկավարման շրջանում կատարված գառը իրողությունն էր պատկերված 1955թ. ՀԽՍՀ ՆԽ կից ՊԱԿ-ի կողմից կազմված «Հանրապետության ղեկավար, պատասխանատու և գիտական աշխատողների, ինչպես նաև մասնագետների «աջ-տրոցկիստական-ազգայնամոլական» կենտրոնի մասնակիցների, որոնք բռնադատվել են 1936թ. Հունիսից մինչև 1937թ. սեպտեմբերի 23-ը ընկած

³⁷ Նույն տեղում, գ. 8997, հ. 4, թ. 136 - 142:

³⁸ Источники, 3. IV. 1996:

³⁹ ՀՀ ՆԳ և ԱԱՆ ԱԱ արխիվ, ԿԳՖ, գ. 8997, հ. 1, թ. 210 - 212:

⁴⁰ Նույն տեղում, դ. 4234, 3823:

⁴¹ Նույն տեղում, գ. 10953:

⁴² Նույն տեղում, դ. 10953, № 2, թ. 451:

⁴³ Նույն տեղում, գ. 5407, № 2, թ. 13, 327, 330:

ժամանակաշրջանում» ցուցակը, որտեղ թվարկվում են 69 ճանաչված մարդկանց անուններ (Ե.Զարենց, Ա.Բակունց, Ս.Տեր-Գաբրիելյան, Գ.Հանեսողյան, Գ.Գումեղին, Ս.Մարտիրոսյան, Մ.Մազմանյան, Ե.Զուքար, Ա.Իոննիսյան, Մ.Ջանյան և այլն)⁴⁴։ Կարծում ենք, որ այդ ցուցակն, այնուամենայնիվ, ամբողջական չէ։

Ինչպես արդեն հիշատակել ենք, տվյալ տարիների մեղադրանքներում Հիմնական «աջ-տրոցկիստական-ազգայնամոլական» գործունեությունից բացի, երբեմն հանդիպում էին նաև ուրիշները, այդ թվում նաև էսէռների կուսակցության պատկանելությունը։ Այդ մեղադրանքով 1938թ. հունվարին ձերբակալվեց մի խումբ (Գ.Աղամալյան, Վ.Մուրոյան, Գ.Տեր-Հակոբյան, Ա.Նալբանդյան, Խ.Կեմալյան, Պ.Թարվերդյան, Մ.Շահապարոնյան, Ս.Մարկոսյան), այն պատճառով, որ նրանք «մինչև Հայաստանում խորհրդային կարգերի հաստատումը եղել են էսէռների կուսակցության անդամներ և հետագայում, մինչև ձերբակալվելը վարել են ակտիվ թշնամական կազմակերպված աշխատանք»։ Այս խմբի անդամները 1956թ. արդարացիվեցին հանցանքն ապացուցված չլինելու պատճառով⁴⁵։

1930-ականի վերջերին ԽՍՀՄ-ում ամրապնդվեց կոմկուսի ամենատիրությունը (տոտալիտարիզմը) և Ի.Ստալինի անձի պաշտամունքը։ Հասարակությունը, որը կրեց աննախադեպ բռնություններ՝ անպաշտպան էր դարձել ճշման ահապարհ մեքենայի առաջ։ Սակայն համընդհանուր ահաբեկչությունը ծայրահեղորեն լարել էր քաղաքական ներքին մթնոլորտը, որը վտանգել էր նաև իշխանավորների վիճակը։ Միևնույն ժամանակ, արտաքին աշխարհում մոլթ ամպեր էին կուտակվում խորհրդային երկրի վրա, որը մոտավորապես պատերազմ էր կանխագուշակում։ Բացարձակ միապետության հասած Ի.Ստալինը չէր կարող չզգալ այդ վտանգները, ուստի կառավարման թելը ձեռքից բաց չթողնելու համար անհրաժեշտ էին մեղմացուցիչ քայլեր։ Նաև դրանով կարելի է բացատրել 1938թ. նոյեմբերի 17-ին Ի.Ստալինի ու ԽՍՀՄ ԺԿԽ-ի նախագահ Վ.Մուրտուզի ստորագրությունը, խիստ զաղտնի վերտառությունը «Ձերբակալությունների, դատախազական վերահսկողության և քննությունները վարելու մասին» որոշման ի հայտ գալը, որն ուղարկվեց բոլոր տեղական կազմակերպություններին։ Փաստաթղթում պահանջվում էր ավելի վստահելի միջոցներով անխնա պայքար մղել ԽՍՀՄ-ի բոլոր թշնամիների դեմ։ Ինչպես պարզվում է փաստաթղթից, 1937 - 1938թթ. ՆԳԺԿ մարմինների կողմից թշնամական տարրերի ջախջախման և արմատախիլ անելու զանգվածային միջոցառումները հանգեցրել էին մի շարք «խոշորագույն թերությունների և խեղաթյուրումների ՆԳԺԿ և դատախազության մարմինների մոտ», ավելին՝ ժողովրդի թշնամիները և արտասահմանյան հետախուզության լրտեսները խցկվել էին այդ մարմինները և կանխամտածված խեղաթյուրումով խորհրդային օրենքները՝ անց էին կացրել զանգվածային և անհիմն ձերբակալություններ⁴⁶։ Ինչպես նկատելի է, ԽՍՀՄ ղեկավարությունը քավություն նոխազ է ընտրում իր իսկ ցուցումները հավատարմորեն կատարողներին։

Կենտրոնի այդ որոշումով վերացվեցին դատական եռյակները։ Նույն տարվա դեկտեմբերի 1-ին հրապարակվում է «Ձերբակալությունների կարգի

⁴⁴ Նույն տեղում, գ. 8997, № 3, թ. 5 - 18։

⁴⁵ Նույն տեղում, գ. 3076, № 6, թ. 217, 315 - 317։

⁴⁶ ՀՀ ՀԲԿԿՊԱ, ֆ. 1, ց. 18, գ. 18, թ. 2։

մասին» որոշումը, որը կազմված էր նույն ոգով⁴⁷ և հատկապես շեշտում էր եռյակների վերացման իրողությունը: Բնականաբար, այդ և Կենտրոնում ընդունված մյուս որոշումներն արտահայտվեցին նաև Հայաստանում, ուր 1938թ. երկրորդ կեսին ևս նկատվեց բռնությունների զգալի նվազում: Այսպիսով, 1930-ական թվականների ստալինյան բռնությունները Հայաստանում լուրջ հարված հասցրին նաև քաղաքական մտքին և սոցիալապես ակտիվ իսպիներին, որն իր բացասական ազդեցությունը թողեց հետագա տարիներին:

ОБЩЕСТВЕННО-ПОЛИТИЧЕСКИЕ ДЕЯТЕЛИ АРМЕНИИ В ГОДЫ СТАЛИНСКИХ РЕПРЕССИЙ

А.С. МАНУКЯН

Резюме

Массовые репрессии в отношении общественно-политических деятелей, интеллигенции, офицеров, духовенства и др. начались со второй половины 1936г., когда по обвинению в «контрреволюционной, право-троцкистской, националистической» деятельности арестовали известного политического деятеля и ученого Нерсика Степаняна, а 9 июля того же года покончил жизнь «самоубийством» первый секретарь ЦК КП(б)А Агаси Ханджян. По предварительным данным, за эти годы были репрессированы свыше ста общественно-политических деятелей Армении.

Сталинские репрессии в Армении нанесли серьезный удар по представителям политической мысли и социально активным слоям населения, что имело отрицательный резонанс и в последующие годы.

⁴⁷ Նույն տեղում, ֆ. 1, ց. 18, գ. 18, թ. 11: